

Njeallje bohcco

Čállán Miina Seurujärvi boares máidnasa “Kolme pukkia” mielde.

Máinnasteaddji
Stállu
Unna stáloš
Čearpmat 1
Čearpmat 2
Varit
Nammaloahppa

Máinnasteaddji: Ledjeba oktii njeallje bohcco; čearpmat, nubbi čearpmat, varit ja nammaloahppa. Sin guohtuneana lei joga oarjjabealde. Joga nuorttabealde lei goittotge ollu buoret guohtun, albma herskot ledje doppe. Šalddi vuolde ásse guokte stálu: Stállu ja unna stáloš. Ovtta beaivve čearpmahat mearridedje vuolgit nuorttabeallái herskostallat.

Stállu: Gii vázzá mu šalddi alde?

Stáloš: Ná, gii vázzá?

Čearpmat 1: Mun dušše čearpmat.

Čearpmat 2: Mun maid čearpmat.

Stállu: Mun boađán ja boran dudno.

Stáloš: Ná, mun maid boađán ja boran dudno.

Čearpmat 1: Ale mu bora, mun lean nu uhcci ja rávžžas.

Čearpmat 2: Ale muge bora, mun maid lean nu uhcci ja rávžžas. Munno maŋábealde boahtá varit, das lea olu eanet maid borrat.

Stállu: Ná manni dalle.

Stáloš: Ná, manni dalle.

Máinnasteaddji: De varitges vulggii čearpmahii maŋŋái nuorttabeallái.

Stállu: Gii johtá mu šalddi alde?

Stáloš: Ná, gii johtá?

Varit: Mun, varit.

Stállu: Mun boađán ja boran du.

Stáloš: Ná, mun maid boađán ja boran du.

Varit: Ale bora, mus lea uhccán biergu. Mu maŋŋá boahtá nammaloahppa, das lea ollu eanet maid borrat.

Stállu: Ná mana dalle.

Stáloš: Ná, mana dalle.

Máinnasteaddji: Nammaloahppa vulggii maiddái earáid maŋŋái.

Stállu: Gii johtá mu šalddi alde?

Stáloš: Ná, gii johtá?

Nammaloahppa: Mun, nammaloahppa.

Stállu: Mun boadán ja boran du.

Stáloš: Ná, mun maid boadán ja boran du.

Nammaloahppa: Boađe beare.

Máinnasteaddji: Stálu guoktá goarkŋuide šalddi ala Nammaloahpa borrat, muhto Nammaloahppa hoigadii Stálu ja Unna Stáloža gu guhkás go bihppor šaddá. Stálu guoktá eaba šat goassige givssidan bohccuid.

Stáloš velá huikkádii: Ii bávččagan!